



Ran khuahkhirh tlat dawn

Chanmari West, 26 August : Chanmari West Local Council chuan Chanmari West veng huam chhungah ran neituten an rante khuahkhirh tlat turin a ti. Sawrkar dan ding laiah chuan ran hi enkawl lo va chhuah mai mai a phal lo va, khuahkhirh tlat tur a ti a ni. Chanmari West veng chhungah hian ran khuahkhirh

lo va tuallai leng mai mai hmuh tur a tam hle a, mi in bul leh kawngpui velah an e nasa a, chu mai bakah ran thenkhat chu a bengchheng hle bawk a ni, hei vang hian ran hi uluk tako khuahkhirh tlat a ngai a ni

Hetihlai hian Chanmari West Branch YMA pawhin ran khuahkhirh tlat hi a duhthusam a ni a, Section thenkhat chu ran chhuak vengin an duty

thin a, nasa zawka hmalak pawh an tum mek zel a ni.

Tunah hian Chamari West Local Council chuan Ui chhuak man a nih chuan Rs 200 leh Ar chhuak man a nih chuan Rs 50 ran neitute chawitir turin thuchhuah a siam ta nghe nghe a, veng chhung mipuite pawhin thuawih taka ran chhuah mai mai lovin tha takin ran i khuahkhirh tlat ang u.

Local Council

PPP MODE

Aizawl Municipal Council-in Aizawl City Local Council-te PPP Mode pawisa khawn tura a hriattir angin, Chanmari West Local Council huam chhungah PPP Mode hmanga chhungkaw tin leh Dawrahte August thla atangin pawisa khawn a ni dawn a ni tih Veng chhung Mipuite kan inhriattir a, PPP Mode pawisa khawn tur hian Pawl (NGO) anga khawn duh emaw mimal anga khawn duh emaw an awm chuan, ni 29,August 2012 (Nilaini) thlengin Pu F. Zosanga Local Council Chairman hnenah plain paper-ah ziakin dil theih a ni.

RAN KHUAHKHIRH (UI LEH AR)

Chanmari West Local Council meeting Vawi-10na ni 23rd August 2012 chuan Chanmari West huam chhungah Ran khuahkhirh tulin a hria a, ni 27th August 2012 (Thawtanni) a

tanga hman tan turin Ui leh Ar khuahkhirh nise tin a rel a, hemi ni atang hian Ui leh Ar khuahkhirh loha chhuah zalen phal loh a ni tih Veng mipuite kan inhriattirin, mahni ranvulh Ui leh Ar theuhte thlung leh pawn chhuak thei lo tura khung theuh turin kan innge a, Ui leh Ar neituin a kai emaw apawm emaw a nih loh chuan pawn chhuah phal loh a ni. Ui leh Ar pawn chhuak an awma man an nih chuan Ui-ah Rs.200/- leh Ar-ah Rs.50/- chawitir a ni ang.

HRIATTIRNA

UD & PA Department hnuiaia BPL Loan & Subsidy diltu, Chanmari West Local Council huam chhunga mite, ni 27th August 2012 (Thawtanni) dar 11:00 AM ah Pu Lalliansangpuia Local Council member Inah Verification neih tur a ni a, BPL Loan & Subsidy diltu zawng zawngte kim taka kal tura hriattir an ni e.

Property Committee

Vanapa Section leh Neuva Section huam chhunga mike tha lo chu siamtha a hnati an a ni a, mike tha lo a awm leh a nih chuan hravuit hnenah hriattir vat tur a ni e.

Hun remchangah Pu TC. Lalhmangaiha huanah inti hlim pah a feh tum a ni.

Mi Maw

Mi pangngai ten an tih thin khawhar in kal te, thlanlah te, mitthi ina thingpui lum leh sem angte hi tihna chang hre lo chu, thiamna lamah mi sang tak niin hausia viau bawk mah se mi maw a ni.

T. Ngurkuma
President, CWBYMA

Branch News

 Tunkar Ni 28.8.2012 (Thawlele) zan khian rokhawlhna a awm loh chuan Branch Executive Committee meeting tum a ni.

 YMA Park a waiting sheed chhia chu siamthat a ni a, YMA Park cheina te dimdawih taka hmang hram hram turin kan innge a, YMA Parkah hian tlangval ruihhlo ti thin an awm tih hriat a ni a, heng mite hian helai hmunah hian ruih theih thil ti tawh lo turin kan inhriattir e.

 Kan veng chhunga damdawi zuarte ruihthei chi damdawi zuar lo hram turin kan innge a ni.

 Inzawnna tur (Stretcher) tha tak mai Pu K. Rochungnunga 'V' Section leh Pu R. Lalbiaktluanga 'CH' Section chuan Branch YMA-ah an rawn pe a, an chungah Brancgh Committee chuan lawmthu an sawi a, hmang duhchuan Pu TC. Lalhmangaiha hnenah lam theih a ni.

SUNNA

Heng mite hian kar kalta chhung khan min boral san a, an chhungte kan tawrhpu tak zet a ni.

1. Ni 18.8.2012 khan Pu Lalrotluanga Sailo kum 66 H/o Vanlalsawmi 'T' Section.

2. Ni 19.8.2012 khan Pi Rohliri M/o Lalziriana 'T' Section.

3. Ni 22.8.2012 khan kan YMA member Pu Zosangpuia kum 41 S/o T. Bualzika 'K' Section



TUNKAR CHANGVAWN

LALPA tihna chuan dam chhung ni a tisei a, Nimahsela mi suaksual kumte chu tih tawi a ni ang. Mi fel nghahfak chu lawmna a ni ang a, Mi suaksual hmachhuan erawh chu a boral ang. Mi dik tak tan LALPA kawng chu kulhbing an i ang a, Thil tha lo titu tan erawh chuan boralna a ni ang.

Thufingte 10:27-29

Editorial Board

Editor:	J.Lalnangliana	9862399658
Joint Editor :	Lalchhandama	9862358347
News Editor :	Thangkhuma	9862303135
	R. Lalrinngetha	9862358337
	Jacob Lalrinsanga	9612319779
Cir.Manager :	Johny Lalthanpuia	9612359161
	EVL. Hruaitluanga	9862655426
Production Manager :	R.Lalhmachhuana	9436151817

Branch Office Bearer

President	T. Ngurkhuma	9436190843
Vice President	R. Lalhmachhuana	9436151817
Secretary	RL. Thanhnuna	9436152760
Asst. Secretary	Zairemmawia	9862385654
Treasurer	C. Lalzarliana	9436142049
Fin.Secretary	K. Darthantluanga	9436196071
Adviser-te :	Pu Lalbiakthanga Khiangte	
	Pu Rothuama, Pi Zamanthangi	
	Pu Lalrengpuia Sailo	

Editorial :

Kan veng chhungah ran khuahkhirh lo va chhuak mai mai a tam hle mai a, hei hi veng changkang lo zia a ni. Ran an chhuah hian thenawmte in velah an e a, kawngpui leh park velahte an e thin bawk a, thil tenawm tak a nih avangin hei hian ran khuahkhirh tul zia a ti lang a ni. Thawm bengchheng tak an chhuah thin avang te, mi seh palh thei a nih avangte hian veng chhunga ran khuahkhirh hi tihmakmawh a ni.

Veng chhungah damdawi dawr nei kan awm nual a, kan mamawh leh tul tak an ni. Chutih rual erawh chuan damdawi atan ni lem lo, ruih atan hmang an awm thin tih hriat a ni a, chuvangin kan veng chhunga damdawi zuarte simkhur a, ruih nana hman tum chu pek lo hram tur a ni.

Park nei veng tlemte zingah kan tel a, kan tel a ni satliah mai lo va, a nei tha leh nei nuam ber kan ni. Mahse, kan parka chawlhna chu tute emawin anti chhia a ni mai thei a, pawi khawp mai. Ti chhetu ni lo va, siamthatu nih kan tum theuh a tha hle mai. Tin, a lengte tan nuam lo khawpin ruihhlo ti thinten ruih nan hman an ching a, hei hi a pawi hle. Naupangte hmuh lai ruih hian zirtir tha lo tak a chhuah thei a ni. Hlim taka veng chhung mite kan len dial dialna tur a nih avangin a chhe zawng chuan hmang lo hram ang u.

2012 Thuvawn

*I awmdan tur chu
LALPA chungah nghan
la; Amah chu ring la,
aman a ti vek ang.*

Essay:**PUTLIN LAM I PAN ANG U.**

"I thil neih leh silhfen ni lovin, i chhungril nihna, takna kha a ni, mihring puitling siamtu che chu" - Billy Sunday

- J. Nanga

A ni reng a, mi puitling ni tur hian silh leh fen, ei leh in, nihna leh neih lam a ni lo va, chhungirla ze dik tak neih a, mawi taka lo lang hi a ni zawk. Nimahsela, he puitling zia nih emaw neih emaw mai theih hi kan nei mai thei thin si lo. Kum upat avang ringawtin mi an puitling ngawt chuang lo va, naupangte pawh an puitling leh hlauh thei thung si. Eng ang hringfa pawh ni se, nu chhul chhuak a nih ngat chuan puitlin lam pan chu a ngai ngei ngei a, chuvang chu a ni ang, kan Bible pawhin puitlin lam pan tura min sawm. He hringnun khawvelah mai hian a tawk lo va, kan thlarau lam nun atan deuh deuh hian a pawimawhin, a tangkaiin, a tul a ni. Tisa leh thlarau nunah puitling chu ni ngat ila, midang te tan malsawmna kan ni thei ngei ang. He khawvela kan lo piangchhuak ve ta rau rau a nih chuan puitlin lam pana, puitling tak nih chu kan tum tur a ni si a, engtinne mi puitling chu kan lo nih tak ang le.

Nunphungah hrim hrim hian hote a lang si, a nachang kan hriat loh avang a puitling lo nih kan hlawh mai hi a tam hle. Mi mit tlunga chet reng chu thil theih lohah ngai ta ila, mahse; miten, "ka rin ang a lo ni lo ngei mai" an tih tura kan chet fo chuan mi puitling zia keimahniah a awm hmel loh hle. Mi puitling chuan a tihtur leh tih loh tur a thlang thiam a, a hria a, a ti bawk thin. Engkim a hun leh hmun taka tih nachang a hria a, a thiltihah reng reng a tawk a hre bawk thin. Harsatna emaw, thinrimna emaw, lungngaihna emaw, lawmna emaw, phur thutna emaw a lo awmin, mi puitling chuan nasa lutukin a tilang nghal mai lo va, ngun leh chik taka a ngaihtuah hnuah a che leh chauh thin. He khawvela nun rawn hmanga, a hnua thi a, ral hlen ta vang vang turah mi puitling chuan a inphal lo va, he khawvel hian tunga a nih tihte, eng nge a tih theih tihte hi hriattir a tum a, he khawvel hian a hriatrengna turin a hawk a, a hre reng bawk ang.

Zirnaah leh hnathawhna kawng hrang hrangah mi puitling chu a tumah a chiang thin. Hlawhtlinna chu thawhrimna avangin a awm thei tih a hria a, chak lohna a lo thlen pawhin, a chakna tipung turin tha thar a chhuah thei thin. Mihring taksa a thiltihtheihna awm chu mi puitling chuan a nih tur angin a hmang thiam thin. Hlawhchhamna chu eng emaw avanga awm thei a ni tih a hria a, mahse; tumah hi hlawhchham reng tura duan kan ni lo tih a hria a, hlaawhchhamna hi hlawhtlinna hmelma angin a en ngai lo va, hlawhtlinna atan a "khan" pawimawh lutukah mi puitling

chuan a ngai zawk thin. Hah khatna a hna bansan chu mi puitling lo zia a ni si a. Kut hnathawh hi a zahthlak loh tih te, eng hna pawh hna hniam bik a awm lo tih te a hria a, eng hna pawh hawk se a rinawm em em thin.

Incheina hi mi ti puitlingtu a ni lo kan han ti tak na a, mi puitling chuan inchei a thiam thung a ni. Chhungirla mi puitling a nihna kha, pawn lam lang thei hian a lo thuam famkim pawh angai thei bawk. Incheinaah hian mi puitling zia a lo lang a, a hun leh hmun a hria a, a tawk a thiam bawk thin. A nihna nena inmil tawkin a inchei a, a neih tawk a mawiin a inthuam thin. Thil mawi leh nallh hi man to kher a ni lo tih a hria a, a thatna a thlir zawk thin. Incheina hi thnlung phawrhtu pakhat a ni tih a hria a, chuvangin uchuak takin a inchei ngai lo. A pawimawh ber a thnlung chu a thawmhaw aiin a uluk a, a chei fai ngun zawk, thnlung hi Pathianin a en thin tih a hriatreng avangin.

Puitlinna lamtluang zawhlu ten an zawh hmaih hauh loh tur leh an zawh ngei ngei thin chu lehkhabu chhiar hi a ni. Mi puitling chuan thil tam tak a hre tur a ni a, chung chu mi 'ka' atang mai chuan hriat vek a harsain, a theih loh a ni. Nimahsela miten an hrilh loh pawh a hriat theihna, lehkhabu chhiarah hian a awm a, tharum angai lo va, pa derdep ve tak tan pawh thil harsa a ni hran lo. Thil reng reng hi hman a nih loh chuan a hlu lo va, chutiang chiah chuan lehkhabu pawh hi chhiar a nih loh chuan a hlu lo va, kan chhiar a, finna thar kan neih belh chiah

.....phek thumnaah zawm

.....phek thum zawmna

CHAWNGBAWLA

Section sum tuaknana sangha zawrh an tum chu sangha man (rate) a san em avangin thulh rih a ni a, tlwmngai le tumte chungah lawmthu an sawi rualin an zawrh leh theih rih dawn loh avangin ngaihdam an dil bawk. Hun remchang hmasah zawrh tum a ni.

Ni 25.8.2012 (Inrinni) khan section YMA Chhangte tan Lem Ziak intihsiakna an buatsaih a. He intihsiakna atana New Horizon School hmantirtu Principal leh a neitu ni bawk Tv Sawmzuala(SirTea) chungah lawmthu an sawi.

Lemziak intihsiaknaa lawmmna atana Rs 5000/- lai tum saktu Pu Laldingliana (Sarah Fashion neitu) chungah an lawm hle.

Ui vulhtute, an ui vulh khawlai a chhuah lo turin an ngen nawn leh a, ui chhuak vai tur hian remchangah vah chhuah leh an tum.

NEUVA

Zan lamah Pasaltha Neuva Inah duty thin a ni a, harsatna emaw buaina a thlen chuan hruaitute hriattir vat thin turin an in chah.

Mithi lumen, Khawhar in leh thlanlaihna a kal te hi YMA member tih tur anih angin a tam thei ang ber tlwmngaih chhuah a kal turin an in chah.

Section mike horn chhia, Property Sub-Committee in an siam sak chu an lawm hle.

Section chhungah ran chhuak an awm thin a, ran neituten mahni ran khuakhkhirh theuh turin an ngen.

KHUANGCHERA

Central Road kawng kama ualau taka zu in leh zu rui thukhawm thin hmuun thum velah an awm thin a, veng chhung an ti mualphoin veng nu leh pate mit a kham hle a, YMA hruaitute hmalak hmain lo insaseng tur a ni e.

Lenkhawm hla zir mek chu Ni. 27.8.2012 (Thawhtan) zanah Pu Ramfangzauva (Marama) te inah zir leh tur a ni a, Nu leh pa leh member zawng zawng te kal vek turin an innge.

Zirtawp zan khan extended meeting an thu khawm a, thu pawimawh tak tak an rel.

Central Roada motor dah thinte dah tawh lo turin an inhriattir.

An hruaitu Lalremruata(Remtea) chhungak thil avanga veng danga awm angai ta chu an ui hle.

VANAPA

Ni 27.8.2012 (Thawlele) zan dar 7:00-ah YMA thutthleng siamna tur sum tuaknan Nimbu tui zawrh leh tur a ni a. Hruaitute kim takin Leader inah kalkhawm leh theuh tur a ni.

Section Project YMA thutthleng leh Dekchi tum duh tan sum leh pai a thawh theih reng a ni tih section nu leh pate an hriattir.

Ni 18.8.2012 (inrinni) khan nilengin YMA thutthleng siamin an hnatlang a, thutthleng 13 lai an siam thei. Hnatlanga rawn thawkchhuakte chungah leh Workshop hmantirtu Pu Laldawnglua te chhungak chungah lawmthu an sawi. Tin, hnatlangte thingpui tui taka lumsaktu Pu Tlangramliana(L), Pu K. Vanlalthanga leh Pu Laltanpuia (TPA) te chhungak chungah lawmthu an sawi. Pi RCi'n thingpui hmeh tur paratha thahinem tak a pe bawk a, Pu Sainuna Sailo chuan Squash um thum (3) a pe a, Pu PC Lalawmawian Squash um 4 leh Biscuit Box 1 a rawn pe bawk a, an chungah lawmthu an sawi.

Ni 18.8.2012 (Inrinni) zan khan section chhunga chhungak harsa hnenah tanpuina Buhfai (bag 1), Chini (kg 1) leh Thingpuipe pek a ni.

Kar leh hun remchangah Committee koh tum a ni.

Ni 24.8.2012 (Zirtawp) tlai dar 5:35 khan Doordarshan-ah section YMA Zaipawl tihchhuah a ni a, remchan zawkna avangin hla pakhat chauh tihchhuah rih a ni a, Ni 31 8.2012(zirtawp) zan dar 5.35 hian hla dang pahnihte chu tihchhuah leh a ni ang. Section member-te lo en theuh turin an sawm.

Section Information mike siamthatsaktu Property committee chungah lawmthu an sawi.

Damlo- Upa H. Lalrawna, Pi Sanglianhangi, Tv Liandanga te damlo chu an thatchhuah thuai an duhsak. thuai an duh hle.

MHIP

MHIP Building chu sak zawh a ni ta a, thla thar atang chuan Handloom Kendra Training Centre chu Indoor Stadium hnuai atangin building tharah hian sawn a ni ang.

MHIP Handloom atangin Naupuakpuan leh Puan bih chite tah a ni a, Vice President Pi K. Sanghluni hnen atangin Rs 150-200 inkarin lei theih reng a ni.

ZOFA

hian a hlu a, a lo tangkai thin a ni tih mi puitling chuan a pawm thlap a ni. Mi sualte leh mi ate nuamtawlna chu zu hmuun a ni a, mi puitlingte nuamtawlna erawh lehkhabu kiangah a ni. Heng vang hi a ni ang, 'Lehkha chhiar hian mi a siam puitling a, lehkha ziak hi mi puitling zia a ni' an lo tih. Lehkhabuan leh kawlawm nei tan chuan ziak ve mai chu mi puitling zia nihna a nih si chuan ziak ve mai tur a ni. Vawikhatnaah chuan a tha nghal viau lo mai thei a, mahse; beih nawn leh thin khan a hlawhtling dawn a, a puitlin thlak bawk a ni.

Mi puitling zia kawng hrang hrangin kan sawi tawh a, kan sawi vek seng loveng. Tam tak hi chu nih emaw, tih emaw, neih emaw mai theih a ni a, chuvangin tih emaw nih emaw mai tur a ni. Chuta tana pawimawh tak mai pakhat chu ngaihtuahna fing tak hmanga, tum ti sang chunga theih tawp a beih a ni. Mi puitling chu a tum leh duhthusamah a chiang a, a ngaituah fel thlap a, a duh chu a hmu mai thin. "Theih loh" tih thu hian mi puitlingte rilruah hmuun a chang lo va, theia a inrin avangin a ti thei thin. Mi puitling chuan thil ni thei leh ni thei lo a thliar hrang thiam a, kumhlun tur leh tur lo a thliar hrang thiam thin.

Mihring tumah kumhlun tur kan awm lo tih a hria a, chuvangin a nih tur angin a hmang thiamin, a hrethiam thin. Hma lam pang hun a eng zawnga thlir a thiam a, eng emaw thil tha lo, lo thleng mah se a thawi dam dan a thiam lehzel thin. Inngaihtlawmna nunin a nung a, mahse; a inngaihtlawm avangin mite aia hniamah a inngaih phah chuang lo. Miten an tih theih chu a ti thei tih a hria a, chumai ni lovin, miten an tih theih loh tha leh tih nachang an hriat loh tha tih tumin a tha leh zung a seng thin. "Rilru hi eng kima engkim a ni, ni a i inhriat chu i ni mai" Gautama Buddha chuan a ti. Chuvangin mi puitling nih i chak a, nih i duh bawk chuan mi puitling chu ni mai rawh, puitling tura sawm i ni reng si a.

YMA AW hi vengchhung chanchin thar hriatna hnar pawimawh tak a ni.

1 Ni 26.8.2012 (Pathianni) tlai dar 3:00 hian Pu VL Thakima (V-sect) inah Executive Committee pawimawh tak koh a ni.

Rallu Lam Documentary Film siam turin hma lak mek a ni a, September thla chhunga chan tan hman tum a ni. Member-te a tul huna thawkchhuak thei mai tura lo inring turin an chah.

Art & Culture Dept atangin Dress chi hrang hrang man tlawm zawkin (subsidy) lei thar a ni.

WORLD SCOUT MOVEMENT DINTU LORD BADEN POWELL

-Scoutmaster Mangheta Ralte

Robert Stephenson Smyth Baden Powell tih hming puin, Kum 1857, Feb ni 22 khan unau pariat zinga a naupang ber ni turin Rev. Professor Herbert George Baden Powell leh Henrietta Grace Smyth-te nupa karah; 6 Standpole Street, Lancaster Gate, London-ah a lo piang a. Kum 3 mi lek a nih laiin a pa hian a boralsan hlauh mai a. Harsa takin, mi rethei leh harsate tanpuina (scholarship) te rinchhanin sikul a kal ve tawk tawk thin. Powell hi a naupanlai chuan inflam ngaina tak a ni a, thiam pawh a thiam viau. Thil thar zir chhuah zel hi a chak zawng a ni thin, lemziak pawh a thiam hle. "Kut khing lehlama mlem ziak chungin, a kut lehlamin thu a ziak zat zat thei bawk"

A naupan chhung hian a hunawl tam ber chu ramhnuiah, sava leh ramsate chezia thlirnan a hmang thin. Hriamhrei zei taka chelek te, thing tlemte hmanga ei rawngbawl dan te, hnime pik leh bawn tak kara chak taka kal dante a zir thin a. Hei hi Scout ze dik tak lo irhchhuahna bul chu a ni ta a ni.

Kum 1876-ah kum 19 mi lek niin a Graduate a, Army Selection Exam-ah mi 700 chuang zingah 2-na niin, Sipai Officer hna zawmin India ram Lucknow-ah 13th Hussar Regiment chu Sub-Lieutenant niin a zawm a. Sipai a tan chhung hian a hnathawh that avangin Chawimawina leh Lawmman engemawzat a dawng a, kum 43 a nih chuan Major General naupang ber a ni ta hial a ni.

Kum 1907-a sipai hna a chawlhsan atang chuan Powell-a chuan an rama mipa naupangte chu chak leh hrisel tha taka an lo puitlin chhoh theihnana enkawl leh buatsah Chu a rilruah a awm lian hle mai a. Mipa naupang tan Camp a buatsah ta a. 27th July-9th Aug 1907 chhungin Brown Sea Island Camp a nei ta a. Hei hi Scout Movement lo intanna chua ni ta a ni. He Camp zawh hian Powell chuan a lehkhabu siam "Scouting For Boys" chu magazine lamahte a chhuah tan ta a, Great Britain ram chhunga mipa naupangte ngaihhlut ber a ni ta hial a ni.

Lord baden Powell hian lehkhabu 34 lai a ziak a, khawvel ram hrang hrang hotute atangin Chawimawina chi hrang hrang 21 lai a dawng bawk. Kum 1941, Jan ni 8 khan kum 83 mi niin a boral. Powell tawngkam mawi tak mai, "Happiness doesn't come from being rich, nor merely from being successful

Central YMA

Ni 13-25.8.2012 chhunga Art & Culture Auditorium, Berawtlanga Central YMA buatsah Ruihhlo ngaita puala Chhanchhuahna Camping chu ni nimin khan an chhuak. He Camping-ah hian Campers 292 an lut a, Pathian a siamtharna change chu mi 181 an ni. Speaker Upa Lalhmacchuana a ni a, Pathianni atanga Thawlehni zan dar 7:00pm ah Chanmari YMA hall-ah Follow Up hi chhunzawm a ni anga, Cable TV ah Live-a tihchhuah a ni bawk ang.

FOOTBALL MANAGING BOARD

Zirtawp ni khan 1st Division teamte chuan Kanan FC 2-2 a drawin Thawhtanni Dar 2:30 st Bn MAP Academy nen an khel leh ang.

Vawiin tlai Dar 3:00 hian managing Board memberte Pu R. Ialsangzualate inah inhmuhkhawm tur a ni e.

in your career, nor by self-indulgence. One step towards happiness is to make yourself healthy and strong while you are a boy, so that you can be useful and so can enjoy life when you are a man" hian Powell-an mipa naupangte hmakhua a ngaihzia a tilang chiang hle awm e.

Scout Movement chu eng nge a nih hrechiang turin a Promise leh Law te lo tarlang ila:

Promise: On my honour I promise that I'll do my duty to God and my country, to help other people and to obey the Scout Law

Scout Law: 1) A Scout's honour is to be trusted

2) A Scout is loyal

3) A Scout's duty is to be useful and to help others

4) A Scout is a friend to all and a brother to every other Scout

5) A Scout is courteous

6) A Scout is a friend to animals

7) A Scout obeys order of his parents, Patrol Leaders or Scoutmaster without question

8) A Scout smiles and whistles under all difficulties

9) A Scout is thrifty

10) A Scout is clean in thought, word and deed.

Scout Movement hi mipa naupangte nunkaihruaitu tha tak a ni tih chu khawvelin a hre chiang ta hle mai a. Tunah hian khawvel ram hrang hrang 161-ah Scout Movement hi din a ni a, member pawh maktaduai 30 chuang an awm mek a ni. Mizoramah pawh Scout Movement hi Sports & Youth Services Deptenkawlna hnuaih chak taka kalpui ve mek a ni.

SMS

SMS thawnna tur : 9862358337.

Kan veng chhungah chhiat tawk kan awm hian (Vui hun bikah) mike hi pawn lama awmte tana hriattlan theih tura ruahmanna siam theih dan awm sela a va tha dawn ve. Vuinaa kal thenkhatte hi chu engmah hre mang lova hawn mai change a awm thei tlat.

9862576280

19th Aug-a Article kha... Ngati nge Basketball Court-ah Football an khel tlat mai! Nge, kan veng hi kan mak ve hrim hrim. Primary School kawt hi Football Ground atana siam nge Basketball Court tur zawk aw?

8794334350

(SMS hi a rawnthalen kimloh avangin hriathiam dan anga phuah rem mai a ni e, Ed)

Veng mipuite'n kan ngaihmawh tlan, vantlang kawng hnaih lutuka ran vulh leh septic tank rimchhia kan sawi thinah hian Kohhran thenkhat hruaitu leh Veng hruaitu thenkhatte pawh fihlim lo kan awm tlat mai. Mitinte'n mahni in leh a vel i vawngfai tlang teh ang u.

9014244297

**SMS kan dawnte hi Editorial
Board ngaihdan a ni vek kher lo.**

MOBILE

Mobile phone second hand lei tur kan nei reng a, A chhia pawh kan lei duh reng e.

C. Lalrinmawia (Cte-a)
c/o Zothangzuala Chhangte
K - Section

SKYNET SKYNET

SHOP OPENING DISCOUNT
SKYNET COMPUTER
OPP. HB MOTORS CHANMARI
kawnah discount mek a ni e. FULL
SET Rs. 19000 atangin duhthlan tur
a awm. 8GB PENDRIVE A FREE-
a pek anni bawk ang. Computer leh
a kaihnawih sevice kan ti thei vekin
discount kan lo pe bawk ang che u,
min rawn pan ve teh.

Tesanga

9862310857

HEI LE LIMBU TUI

Limbu Tui firtha tak kan nei
reng e, min dawr thin tute
chungah lawmthu kan sawi e.
Bottle khat Rs 60, bottle hnih
Rs 100-in kan pe chhuak leh ta
chur chur e.

VL. Chhunga, T- Section

(2-2) Ph:9862926173